

Faasoā Atu o le Fiafia e Faavavau

O se tasi o mea e sili ona manaia e uiga i le talalelei o le malamalama e uiga i le ata o le faaolataga. Tatou te maua le avanoa matagofie e faatasi ai ma o tatou aiga mo le faavavau. O lena malamalama e fesoasoani tatou te maua ai le faamoemoe i soo se taimi tatou te lagona ai le lofituina e le lalolagi. Ua aoao mai Peresitene Eyring, “E silafia e lo tatou Tama Faalelagi agaalofa o tatou loto. O Lana fuafuaga o le aumaia ia i tatou o le fiafia (tagai 2 Nifae 2:25). O lea na la tuuina mai ai le meaalofa o Lona Alo ia mafai ai ona maua le olioli o sootaga faaleaiga e faauau e faavavau. . . . O se ofo lea e mafai ona maua e atalii ma afafine uma o le Atua e o mai i le lalolagi.”

O lena faamanuiaga e faatatau ia i tatou o loo ola i le taimi lenei ma ia i latou o e ua maliliu—peitai e na o la tatou fesoasoani lava e mafai ai. O o tatou tuua o loo i le lalolagi o agaga i le taimi nei, o loo faatalitali mai mo i tatou e saunia o latou igoa mo sauniga o le malumalu ina ia faataunuuina e fai ai ma o latou sui. Peitai o nisi o taimi e faigata ai ona fai



le galuega mo i latou. Atonu tatou te pisi tele, pe atonu e mamao mea tatou te nonofo ai mai se malumalu e o atu soo ai i ai.

O le mea e lelei ai, o loo i ai isi auala e mafai ona tatou fesoasoani ai i o tatou tuua, e pei o le faiga o galuega tala-faasolopito o aiga, taina faalelei o igoa o tagata ua maliliu, po o le vaaiga o nai o tatou tei ae o atu o tatou matua i le malumalu. E ala i le fesoasoani atu, tatou te auuuna atu ai i le Alii *ma* aumai le faamoemoe o aiga e faavavau ia i latou o loo i le isi itu o le veli.

TAMAITI

E Faavavau Aiga

O na o le Togiola a Iesu Keriso ma le toefuataiga o mana o le perisitua e faamau ai aiga, ua mafai ai ona tatou toe nonofo e faavavau ma o tatou aiga! O a mea e te fiafia ai e uiga i lou aiga? Mulimuli i faatonuga nei e fai ai le filifili pepa e faailoga ai lou aiga.

1. Gagau faalua se fasipepa i le afa ina ia maua ai se fasipepa umi e tasi.
2. Tusi se ata o se tagata ma ona lima e tau atu i tulimanu o loo gagau.
3. Oti ese le ata o le tagata. Aua le otia le vaega o loo papai atu ai lima i tulimanu o loo gagau.
4. Talatala. Tusi se faaupuga po o se ata o se mea e te fiafia ai e uiga i tagata taitoatasi o le aiga.
5. Faapipii faatasi ni filifili pepa se tele pe afai e toatele lou aiga!

